

Ministarstvo unutrašnjih poslova Kantona Sarajevo, Uprava policije, ulica La Benevolencija broj 16, koga zastupa zamjenik policijskog komesara, Glavni inspektor Fatmir Hajdarević, (u daljem tekstu Ugovorni organ)

i

Gold Mignon d.o.o. Sarajevo, Olimpijska bb, ID broj: 4200199130009, koga zastupa direktorica Esma Čengić, (u daljem tekstu: Dobavljač)

Zaključili su:

UGOVOR O SUKCESIVNOJ NABAVCI PREHRAMBENIH PROIZVODA (lot 1 – Prehrambeni proizvodi i proizvodi široke potrošnje)

Član 1.

Predmet ovog ugovora je sukcesivna nabavka prehrambenih proizvoda (LOT 1) za potrebe Uprave policije Ministarstva unutrašnjih poslova Kantona Sarajevo.

Ugovor se zaključuje u skladu sa uslovima iz tenderske dokumentacije, ponudom Dobavljača, odredbama Okvirnog sporazuma broj 02-11-4-3043-8/22 od 23.05.2022. godine i stvarnim potrebama Ugovornog organa.

Ponuda Dobavljača broj 054-04/22 za LOT 1 je sastavni dio ovog ugovora.

Član 2.

Ukupna vrijednost ovog ugovora bez PDV-a za LOT 1 iznosi 10.000,00 (desethiljada i 00/100) KM.

Dobavljač se obavezuje da se cijene iz Ponude neće mijenjati do isteka ovog ugovora.

Član 3.

Dobavljač se obavezuje da će u roku od deset (10) dana od dana obostrano potpisanog ugovora dostaviti garanciju za uredno izvršenje ugovora u obliku bezuslovne bankarske garancije u iznosu od 10% od vrijednosti ugovora sa klauzulom plativo na prvi pisani poziv korisnika garancije i bez prava prigovora, sa rokom važnosti: rok izvršenja ugovornih obaveza + 30 dana.

Ukoliko Dobavljač ne dostavi garanciju za uredno izvršenje ugovora u predviđenom roku, nakon zaključivanja ugovora, zaključeni ugovor smatra se apsolutno ništavim.

Član 4.

Dobavljač se obavezuje da će isporučena roba odgovarati važećim propisima o kvalitetu robe u BiH i da će odgovarati pakovanju-gramaži koja je određena specifikacijom Ugovornog organa.

Svi artikli iz ponude, moraju biti u prvoj polovini roka trajanja sa deklaracije na dan isporuke.

Svi artikli iz ponude za LOT 1, moraju biti u originalnom pakovanju proizvođača i sa deklaracijom. Deklaracija mora biti označena na jednom od službenih jezika u Bosni i Hercegovini i mora biti lako uočljiva, jasna i čitka.

Deklaracija obavezno mora da sadrži:

- Naziv proizvoda i njegovo trgovačko ime
- Naziv proizvođača
- Rok trajanja
- Neto količinu proizvoda
- Listu sastojaka hrane
- Za uvozne proizvode, pored naziva proizvođača i zemlje porijekla hrane, ime i adresu uvoznika.

Član 5.

Dobavljač je dužan da robu isporuči u roku od 1 (jednog) dana od dana dostavljanja/prijema narudžbe, započevši najranije nakon obostranog potpisivanja ugovora.

Roba će se isporučiti na adresu Ugovornog organa - Uprava policije Ministarstvo unutrašnjih poslova Kantona Sarajevo.

O mjestu isporuke Dobavljač će biti naknadno obaviješten, prilikom svakog pojedinačnog slanja narudžbe.

Član 6.

Prilikom isporuke robe koja je predmet ovog ugovora, ovlaštena osoba Dobavljača je obavezna ovlaštenoj osobi ispred Ugovornog organa dostaviti otpremnicu za isporučene robe (po vrsti i količini) u dva primjerka, koja je uredno ovjerena i potpisana od strane ovlaštene osobe Dobavljača. Po prijemu robe otpremnicu potpisuje i ovlaštena osoba Ugovornog organa, zadužena za prijem robe u magacinu.

O isporučenoj robi bit će sačinjen zapisnik o kvantitativnom i kvalitativnom prijemu (čiji će sastavni dio biti otpremnica). Zapisnik se sačinjava u dva istovjetna primjerka, od kojih jedan zadržava Ugovorni organ, a jedan Dobavljač. Zapisnik će biti potpisan od strane ovlaštenog lica Ugovornog organa i od strane ovlaštenog lica Dobavljača. Sve primjedbe na izvršenu isporuku će biti konstatovane u zapisniku.

Ukoliko lice zaduženo za prijem robe konstatuje određene nedostatke u kvalitetu ili kvantitetu isporučene robe, neće se sačinjavati zapisnik o prijemu, već će se sačiniti zapisnik o reklamaciji, koji Ugovorni organ dostavlja Dobavljaču.

Ovlaštene osobe ispred ugovornih strana će biti određene i strane međusobno obavještene o tome, u roku od 10 (deset) dana od dana potpisivanja ovog ugovora.

Član 7.

Dobavljač se obavezuje da će isporuke vršiti u skladu sa zahtjevom Ugovornog organa i da će odmah postupiti po eventualnim primjedbama Ugovornog organa u pogledu nedostataka na ime kvaliteta isporučene robe.

Član 8.

Dobavljač se obavezuje priznati reklamaciju na kvantitet i kvalitet isporučene robe, koja će biti proračunata zapisnikom o reklamaciji, uz obavezno navođenje nedostataka isporučene robe i datuma i broja računa (otpremnice) Dobavljača kako bi se zadovoljili uslovi reklamacijskog roka.

Roba će se smatrati uredno isporučenom tek kada u zapisniku o prijemu bude konstatovano da je primopredaja izvršena bez primjedbi.

U slučaju osnovanih primjedbi na ispunjenje ugovorenih obaveza Dobavljača, konstatovanih u zapisniku o reklamaciji, Dobavljač je dužan da o svom trošku učini sve da te nedostatke otkloni u što kraćem roku, koji će mu u zapisniku odrediti Ugovorni organ.

Član 9.

U slučaju kašnjenja u isporuci roba, do kojeg je došlo krivicom Dobavljača, isti će platiti ugovornu kaznu u skladu sa Zakonom o obligacionim odnosima u iznosu od 1% vrijednosti naručene robe, za svaki dan kašnjenja do urednog ispunjenja, s tim da ukupan iznos ugovorne kazne ne može preći 10% od ukupno ugovorene vrijednosti koja je predmet narudžbe. Odabrani ponuđač je dužan platiti ugovorenu kaznu u roku od 7 (sedam) dana od dana prijema zahtjeva za plaćanje od Ugovornog organa.

Ugovorni organ neće naplatiti ugovorenu kaznu ukoliko je do kašnjenja došlo usljed više sile.

Pod višom silom se podrazumijeva slučaj kada ispunjenje obaveze postane nemoguće zbog vanrednih vanjskih događaja na koje Dobavljač nije mogao uticati niti ih predvidjeti.

Član 10.

Ugovorni organ će ugovorenu cijenu plaćati Dobavljaču u roku od 30 (trideset) dana od dana uredno izvršene isporuke robe i dostavljanja pojedinačne fakture, na tekući račun Dobavljača.

Član 11.

Ukoliko poslije zaključenja ovog ugovora nastupe okolnosti više sile koje dovedu do ometanja ili onemogućavanja izvršenja obaveza definisanih ugovorom, rokovi izvršenja obaveza će se produžiti za vrijeme trajanja više sile.

Viša sila podrazumijeva ekstremne i vanredne događaje koji se ne mogu predvidjeti, koji su se dogodili bez volje i utjecaja ugovornih strana i koji nisu mogli biti spriječeni od strane pogođene višom silom.

Višom silom mogu se smatrati poplave, zemljotresi, požari, politička zbivanja (rat, neredi većeg obima, štrajkovi), imperativne odluke vlasti (zabrana prometa uvoza i izvoza) i sl.

Ugovorna strana pogođena višom silom odmah će u pisanoj formi obavijestiti drugu stranu o nastanku nepredviđenih okolnosti uz prilaganje odgovarajućih dokaza.

Član 12.

Ugovorni organ zadržava pravo raskida ugovora ukoliko isporučena roba u smislu kvaliteta i svih drugih elemenata ne bude u potpunosti odgovarala uslovima iz prihvaćene ponude Dobavljača.

Ugovorne strane su saglasne da svaka strana može jednostrano raskinuti ovaj ugovor i zadržati pravo na naknadu štete zbog raskidanja ugovora u slijedećim slučajevima:

- ako Dobavljač kasni sa isporukom, a zakašnjenje nije posljedica vanrednih okolnosti (više sile);
- ako Dobavljač dođe u situaciju da ne može ispoštovati ugovor (stečaj, likvidacija i sl.);
- ako neka od ugovornih strana svoje dospjele obaveze ne ispuni ni u naknadno prihvatljivom roku za sve ugovorne strane;
- ako je iz okolnosti posla jasno da jedna od ugovornih strana neće moći ispuniti svoju obavezu i onda kada bilo koja ugovorna strana izjavi da svoju obavezu neće ispuniti.

Obavještenje o jednostranom raskidu ugovora i okvirnog sporazuma u okviru kojeg je zaključen pojedinačni ugovor mora se dostaviti drugoj ugovornoj strani isključivo u pismenom obliku.

Ukoliko Ugovorni organ ocijeni da Dobavljač nije u stanju kontinuirano i kvalitetno izvršavati preuzete obaveze, odnosno ukoliko ponuđena roba nije u skladu sa datom ponudom iz člana 1. ovog ugovora, Ugovorni organ može jednostrano, bez saglasnosti Dobavljača, raskinuti ovaj ugovor.

Član 13.

Dobavljač nema pravo zapošljavati, u svrhu izvršenja ugovora, fizička ili pravna lica koja su učestvovala u pripremi tenderske dokumentacije ili su bila u svojstvu člana ili stručnog lica koje je angažirala Komisija ugovornog organa za javne nabavke, najmanje 6 (šest) mjeseci po zaključenju ovoga okvirnog sporazuma, odnosno od početka realizacije ugovora.

Član 14.

Na sva pitanja koja nisu regulisana ovim ugovorom, primjenjivat će se odredbe Zakona o obligacionim odnosima.

Član 15.

Eventualno nastale sporove pri realizaciji ovog ugovora, ugovorne strane će rješavati sporazumno, a ukoliko to nije moguće, utvrđuje se nadležnost Suda u Sarajevu.

Član 16.

Ovaj ugovor je zaključen kada istu potpišu obje ugovorne strane i traje do realizacije ugovorene vrijednosti, odnosno do izmirenja dužničko-povjerilačkih odnosa, a najduže 1 (jednu) godinu od dana obostranog potpisivanja ugovora. Ovaj ugovor izrađen je u četiri (4) istovjetna primjerka, od kojih po dva (2) zadržava svaka ugovorna strana.

DOBAVLJAČ
Gold Mignon d.o.o. Sarajevo


direktorica
Esma Čengić



UGOVORNI ORGAN
MUP KANTONA SARAJEVO
UPRAVA POLICIJE

ZAMJENIK POLICIJSKOG KOMESARA
Glavni inspektor
Fatmir Hajdarević

Broj: 907-94-05/23

Datum: 15.05.2023.g

Broj: 02-11-4-3043-11/22

Datum: 08.05.2023. godine